

Headlines

1. खजाना मंत्री निर्मला सीतारमण होंरें अपना उप्परोतली 9मां बजट अज्ज लोकसभा च पेश कीता। इसी युवा शक्ति आसेआ संचालित बजट करार दिंदे होई सीतारमण होंरें आखेआ जे एहू बजट समर्थ निर्माण ते सुधारें पर केन्द्रित ऐ।
2. लेफ्टिनेंट गवर्नर मनोज सिन्हा होंरें ब'रे 2026-27 आहले केन्द्री बजट दी सराहना करदे होई आखेआ ऐ जे एहू बजट युवाएं, महिलाएं ते करसानें लेई ऐतिहासिक सशक्तिकरण दा वायदा करदा ऐ।
3. अज्ज पेश कीते गेदे केन्द्री बजट च जम्मू-कश्मीर गी 43 ज्हार 290 करोड़ रपे थ्होए न ते एहू रकम मजूदा माली ब'रे लेई थ्होई दी रकम शा तकरीबन 2 ज्हार करोड़ रपे मती ऐ।
4. खेडू मंत्री सतीश शर्मा होंरें आखेआ ऐ जे नशे खलाफ लड़ाई, मिशन आहली भावना कन्नै चलाई जा'रदी पैहलकदमी ऐ। उ'नें आखेआ जे इक सेहतमंद समाज लेई युवाएं दी भागीदारी अत्त लाज़मी ऐ।
5. प्रदेश दिएं उच्चिं धारें पर अज्ज हौली बरखा ते बर्फबारी दे असार - मौसम विभाग ने आखेआ ऐ जे औंदी 10 फरवरी तगर प्रदेश च मौसम आमतौर पर खुशक रौहग।

<><><><><><>

Union Budget

वित्त मंत्री निर्मला सीतारामन होंरें अज्ज लोकसभा च माली ब'रे 2026-27 दा बजट पेश कीता। एहू उ'दा रिकॉर्ड 9मां बजट हा। लोकसभा च अज्ज केन्द्री बजट पेश करदे होई वित्त मंत्री होंरें आखेआ जे एहू युवा शक्ति आसेआ संचालित बजट ऐ। वित्त मंत्री होंरें इस दरान देशै दे नागरिकें दे जीवन च आए दे सुधारें ते गरीबी च आई दी कमी लेई पुट्टी गेदिएं गैहीं पर लोऽ पाई। उ'नें आखेआ जे इस ब'रे दा बजट त्रै कर्त्तव्यें थमां प्रेरित ऐ। इंदे चा इक कर्त्तव्य, आर्थिक विकास दी रफ्तार गी तेज करने, दुआ, लोकें दी समर्थ च बाह्दा करने ते त्रीया हर इक परोआर, समुदाय, खित्ते ते खेत्तर गी संसाधन, सुविधां ते मौके उपलब्ध करोआने दे बारै च ऐ। खजाना

मंत्री होरें ऐलान कीता जे 10 ज्हार करोड़ रुपें दे बजट कन्नै बायो-फार्मा शक्ति दा शुभारंभ कीता जाह्ग।

<><><><><><>

LG-Budget

लेफ्टिनेंट गवर्नर मनोज सिन्हा होरें बरें 2026-27 लेई अज्ज लोकसभा च पेश कीते गेदे केन्द्री बजट दी सराहना करदे होई इसी बवहारिक बजट करार दित्ता ऐ ते कन्नै आखेआ ऐ जे जे एहू बजट आर्थिक विकास गी रफ्तार देने दे कन्नो-कन्नो भविक्ख लेई तैयार ढांचे दा निर्माण करोग। उ'नें आखेआ जे एहू बजट विकास दी दर गी बरकरार रक्खग ते कन्नै किश बरें अंदर भारत गी 5 ट्रिलियन डॉलरें आहली अर्थबवस्था बनाने दी बत्त पदरी बी करग। एलजी होरें आखेआ ऐ जे केन्द्र सरकार दी व्यापक माली रणनीति, समाजी कलयाण दे कन्नै विकास बाढ़े दिएं आसें-तांगें गी संतुलित करने दा कम्म करग। केन्द्र शासत प्रदेश जम्मू-कश्मीर च पर्यावरण दे लेहाज कन्नै मुआफिक ते टिकाउ प्हाड़ी रस्तें दे विकास लेई प्रधानमंत्री नरेन्द्र मोदी ते खजाना मंत्री निर्मला सीतारमण हुं'दा आभार प्रगट करदे होई एलजी सिन्हा होरें आखेआ जे एहू पैहलकदमी, कम्म-रोजगार दे नमें मौके पैदा करने दे कन्नो-कन्नो प्रदेश दे सैलसफा उद्योग च नमें सिरेया जान भरने दा कम्म बी करग।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश, अज्ज रातीं 10 बजे, केन्द्री बजट 2026-27 पर 30एं मिंटें दे इक बशेश कार्यक्रम दा प्रसारण करग। इस बशेश कार्यक्रम च साढ़े परौहने होडन केन्द्री युनिवर्सिटी जम्मू दे इकोनॉमिक्स विभाग दे प्रमुख, प्रोफेसर असबनी नन्दा जेह्ङे केन्द्री बजट दे बक्ख-बक्ख पैहलुएं पर अपने माहिराना बचार सांझे करडन। इस कार्यक्रम दी मेज़बानी साढ़े न्यूज़ एंकर जगमोहन शर्मा आसेआ कीती जाह्ग।

<><><><><><>

Poonch Accident

पुंछ जिले दे जंदरोला इलाके च अज्ज पेश आए दे इक दर्दनाक शिड़क हादसे च बिजली विकास विभाग दे 2 कर्मचारिएं दी मौत होई गई ऐ जिसलै के द'उं होर जने जख्मीं बी होए न। पुलसै मूजब, एहू हादसा उसलै होआ जिसलै पुंछ थमां गली पिंडी बक्खी जा'रदी गड्डी दे डरैवर दा ओहदे पर काबू नेई रेहा ते गड्डी, सिड़कै परा रूलकियै हेठ डूहंगी खाई च जाई डिग्गी। मुकामी बसनीक ते पुलस दिकां टीमां हादसे आहली थाहै पर पुजियां जेहदे मगरा बचाऽ अभियान रम्भी दित्ता गेआ।

<><><><><><>

Mini Marathon

खेडू मंत्री सतीश शर्मा होरें अज्ज जम्मू-कश्मीर दे युवा सेवाएं ते खेडू सरबन्धी निदेशालय आसेआ आयोजित इक लौहकी द्रौड़ मिनी मैराथान 1.0 “Run with the rising sun: गी झंडी दस्सियै रवाना करोआया। इस मौके पर निदेशालय दियां महानिदेशक अनुराधा गुप्ता ते होर दुए सीनियर अधिकारी बी उत्थे मौजूद हे। प्रतिभागियें गी संबोधित करदे होई मंत्री होरें आखेआ जे सरकार इक मिशन आधारित तरीके कन्नै नशीले पदार्थें दी लत आली समस्या दा मकाबला करा'रदी ऐ ते चेचा करियै ध्यान बच्चें ते नौजवानें दी सुरक्षा गी दित्ता जा'रदा ऐ। उनें जोर देइयै आखेआ जे इक सेहतमंद अनुशासित ते नशे थमां मुक्त समाज बनाने आसेआ सरकार आसेआ कीते गेदे हर वायदे गी पूरा कीता जाहगा।

<><><><><><>

Kohli-LG

साबका काबिना मंत्री इंजीनियर अब्दुल गनी कोहली होरें अज्ज उपराज्यपाल मनोज सिन्हा हुं'दे कन्नै मलाटी कीती। बन्ने आले जिले पुंछ ते राजौरी च विकास सरबन्धी बक्ख-बक्ख मुद्दें पर चर्चा कीती। बकरवाल परोआरें दा मुद्दा पुट्टदे होई कोहली होरें आखेआ जे इनें खानाबदोश परोआरें गी स्याले दरान बड़ी मुश्कलें दा सामना करना पवा'रदा ऐ कीजे उन्दे कश कोई स्थाई आसरमा नेई ऐ ते उ'नेंगी तम्बू च रौहने लेई मजबूर होना पवा'रदा ऐ। उनें उपराज्यपाल होरें'गी गुजारिश कीती जे उन्दे रौहने-बौहने आस्ते कोई स्थाई बदोबस्त करोआन जेहड़ा समुदाय दी भलाई आस्तै बड़झ मता जरूरी ऐ।

Essay-Camp

77में गणतंत्र दिवस दे उपलक्ष्य च जम्मू-कश्मीर सूचना ते जनसंपर्क विभाग आसेआ आयोजित कीते गेदे आनलाइन निबंध लेखन प्रतियोगिता च उधमपुर दे भारती विद्या मंदर हायर सैकेंडरी स्कूल दी 6मीं जमात दी छात्रा काव्या सिंह नै प्रदेश सतह पर पैहली थाहर हासल कीती ऐ। काव्या हुं'दी रचनात्मकता ते देशभक्ति दी भावना आले इस लेख नै जूरी दा मन मोही लैती। काव्या होरें'गी 10 ज्हार रपें दा नकद ईनाम बी दित्ता गेआ ऐ जिसी उपराज्यपाल मनोज सिन्हा होरें भेंट कीता हा।

<><><><><><>

Weather-Update

जम्मू-कश्मीर च मौसम ज्यादातर खुशक रौहने दी मेद ऐ ते 10 फरवरी तगर बरखा जां बर्फबारी दी कोई पेशगोई नेई ऐ। उआं केंद्र शासित प्रदेश दे मते सारे इलाकें च अज्ज हौली शा दरम्याने दर्जे दी बरखा ते बर्फबारी दी मेद ऐं कई खेत्तरें च 2 फरवरी दी रातीं ते 3 फरवरी दी दपैह्री दरान हौली बरखा जां बर्फबारी बी होई सकदी ऐ ते जम्मू-कश्मीर च 4 शा 6 फरवरी तगर मौसम दे हालात खुशक बने दे रौहडन।

<><><><><><>